

天台智者大師齋忌禮讚由序

宋天竺寺慧雲大師蓮式述

余嘗見諸處傳山門教迹或當

大師遠忌追慕修齋皆關其修禮之法今著數偈略用伸仰夫內心寂照功成入位外則

神通說法應手羣緣故生化始終凡十二偈實統智定之用耳雖於別傳少有不次蓋別

樹一場次第之意初二偈三昧降魔次說法華又次說止觀淨名涅槃放生施戒皆如次

也沒後靈感一偈難盡芳猷他方之身請護遺教洎五悔合十七偈觀者無嫌辭近理寡

聊備其以時追想之誠耳或略可濟用稱唱之時宜須鄭重必希感召永蔭教門目為智者齋忌禮讚文云爾

天台智者大師齋忌禮讚文

僧眾三禮各各互號

燒香散華首者唱云

稽首天台教主佛龍禪師般若之神鑒無邊

解脫之光臨莫盡聲揚虛谷響答何疑機扣

真慈應來不惑竊以真如清淨本無色像之

端法界含容遂有往來之狀垂形萬有混迹

群方誰知證妙位高抵仰池深華大蘊堯舜

二君之奇相作陳隋兩國之尊師說法圓融

降魔自在智定之巍巍若是慈悲之霽霽難

量經云著如來衣入如來室坐則如來所坐

行則如來所行為如來手摩以如來肩荷應

以如來供養而供養之功德不可稱量讚歎

略難窮盡今則伏值鶴林追遠敢言恭稟非

馨聊薦精誠仰惟昭鑒初時唱已便請若餘時但除請直唱此語

已便改

一心奉請天台教主智者大師

惟願降臨道場受我供養三請下皆準此

一心奉請天台高祖無畏論師龍樹尊者

一心奉請天台宗教第二祖師北齊尊者

一心奉請天台適嗣第三祖師南岳尊者

一心奉請天台結集教藏第五祖師章安尊者

者

一心奉請天台教觀第六祖師法華尊者

一心奉請天台教觀第七祖師天宮尊者

一心奉請天台教觀第八祖師左谿尊者

一心奉請天台記主第九祖師荆谿尊者

請已讚歎

法界圓融象無所象真如清淨化無所化雖

象無所象無所而不象化無所化無所而不

化燦燦現二王之相雄雄為兩國之師化緣

謝南岳之言道譽重東林之價舊本又云法稱揚今則伏值遠忌之晨略展薦蓋之禮具有疏詞仰對宣白

一心頂禮大蘇山內修法華三昧時身天台

智者

遊心法界諸心寂 如日依空不住空

自天台智者下眾和拜起已讚歎

三千實相頓圓明 八萬塵勞等真淨

靈山妙會依依見 寶塔全身了了觀

不是親逢南岳師 人誰識此深禪相

故我一心歸命頂禮一拜下皆準此

一心頂禮華頂峯上降伏天魔眾時身天台

智者

孤禪片石心彌淨 寒擁深雲夜未央

忽震千雷動地來 潛窺百怪掀天至

始覺鬼神纔散滅 還為父母更綢繆

強輒消摩寂照功 神僧出現親稱讚

一心頂禮瓦官精舍開法華妙義時身天台智者

驚峯極唱經稱妙 四十餘年秘不談
家業須逢嫡子傳 髻珠不是隨勲得

權實巍巍唯佛了 本迹汪汪補處疑

智者當時親得聞 瓦官重更分明說

一心頂禮玉泉寶閣說摩訶止觀時身天台智者

九旬慈澤開圓行 十法融談立妙乘

寶車高廣具莊嚴 白牛肥壯行平正

安御四緣遊直道 能過十境到涼池

乘壞驢車滿世間 稽首天台誓依怙

一心頂禮太極殿上講仁王般若時身天台智者

百座似星環北極 四依如月出東溟

八辯洋洋萬國安 雙空蕩蕩千灾散

玉指競鳴金殿響 牛香重發獸爐騰

稽首巍巍五忍身 堪消萬乘殷勤禮

一心頂禮陳隋兩國授二宮頓戒時身天台

智者

玉珮鏘鏘圓法座 金爐靄靄對人師

拜手咸求服戒纓 傾眸不捨瞻慈相

五德精明如滿月 二嚴深廣類滄溟

人中師子法中龍 隋主從茲稱智者

一心頂禮佛隴道樹解淨名禪講時身天台智者

行道霜林香徑淨 冥心月樹石房寒

明靜功夫只自知 幽深境界何人到

秉筆或因隋帝命 開經時感梵僧來

我等當時恨不逢 歸命天台禪智海

一心頂禮靈石海岸開涅槃萬句時身天台智者

海山一點秋光裏 金閣危層翠嶂間

萬句圓開解脫門 千徒競擁慈悲堂

經按夜分江墅月 講鐘寒徹水村家

三德彌資三觀明 無人共飽醍醐味

一心頂禮放生池上講金光流水時身天台智者

方舟泛泛清江上 法語嘮嘮碧浪心

兩岸香飄野老隨 中流磬發金鱗躍

計謂獄中曾赴難 修禪堂上解酬恩

而今依舊簷梁多 慈眼他方應憫見

一心頂禮石城金刹現雙林善寂時身天台智者

化緣火滅機薪盡 端坐冥冥石像前

諸子號咷竟不還 群生盲瞶誰開導

星河慘淡金波缺 雲谷颺颺鶴樹低

百金妙藥寄章安 猶恨無人付禪慧

一心頂禮佛隴樹下帝封靈塔全身天台智者

加趺宛似安禪貌 閉塔猶同拈定房

初夜流光徹遠林 有時彈指聞深院

年年紫詔離金闕 歲歲皇華啓石門

最後開封失舊身 不知全往何方去

一心頂禮十方世界普生佛刹中身天台智者

慈修天眼應遙見 六十餘州舊結緣

既將種子播良田 須為萌芽作甘雨

父去謾留身後藥 親離空繫醉中珠

神州佛隴願重遊 速使群生開佛慧
一心頂禮天台高祖無畏論師龍樹尊者
一心頂禮天台宗教第二祖師北齊尊者
一心頂禮天台適嗣第三祖師南岳尊者
一心頂禮天台結集教藏第五祖師章安尊者

者
一心頂禮天台教觀第六祖師法華尊者
一心頂禮天台教觀第七祖師天宮尊者
一心頂禮天台教觀第八祖師左谿尊者
一心頂禮天台記主第九祖師荆谿尊者

禮已各號燒香散華默運心十心運
十心已想對一切三寶諸祖前行懺悔

至心懺悔我及十方法界一切衆生自無明
無始時來順有識有流結使動身口意隨貪
瞋癡造七遮五逆之愆犯十重四夷之戒毀
謗三乘正教平陵五種法師行四邪五邪坐
無慚無愧指三塗如園觀具八苦爲莊嚴生
生向邪見家生世世出空無佛世何緣今日
偶得人身效雪嶺出家值天台遺教但恨昏
雲久覆見網交纏千如權實法門濫稱染指

十法成乘妙觀未始經心空有臨池羨魚不
解歸家結網癡猿未鑠五塵之林裏長飛渴
鹿當陽六欲之澤中永驚故使身圍法座心
繞塵緣八音之徒震雷霆四辯之謾陳乳色
加以謔談聖典侮慢教文寧思法佛全身豈
念雪山半偈現招愚暗來報邪癡謗人慢法
之愆萬劫千山之障如斯罪惡無量無邊對
三寶披陳向四依發露斷相續念捨覆藏心
願普承懺悔光明衆罪等虛空清淨懺悔已
一心歸命普禮

至心勸請

一念一時咸勸請 十方刹海劫如來
普爲衆生轉法輪 莫便涅槃歸寂滅
三乘賢聖諸知識 一切慈悲住世間
但作衆生利樂緣 我皆勸請身心禮

勸請已一心歸命普禮

至心隨喜

虛空法界微塵數 諸佛從初發道心
修行劫海得菩提 乃至涅槃分舍利
三乘賢聖無生業 十善凡夫有漏因

乃至低頭小善根 我皆頂戴生歡喜
隨喜已一心歸命普禮

至心迴向

從初乃至於隨喜 三業修行衆善根
迴入虛空實際中 等同利樂群生界
所修福智皆知合 所成身土悉莊嚴
最後微塵衆道場 普共衆生成正覺
迴向已一心歸命普禮

至心發願

願我常隨諸佛學 微塵刹海劫修行
析骨書經等妙高 亡軀爲法周沙界
宣揚諸佛圓常教 開示衆生解脫門
雖然究竟佛菩提 不捨普賢菩薩行

舊有願文
錄之於此

願我盡生無別念 天台妙教獨相隨
聲香浩浩罷搖情 名利汪汪休奪志
展卷研幾雲屋夜 冥心索隱雪房時
諸祖傳弘普海深 願常冥助今開悟

發願已一心歸命普禮

天台智者大師齋忌禮讚文

天台智者大師齋忌禮讚文

校勘記

- 一 底本，明永樂北藏本。
- 一 六七一頁上二行首字「宋」，南無。
- 一 六七一頁上三行第二字「嘗」，南作「常」。
- 一 六七二頁中一四行第一三字「嶂」，徑作「障」。
- 一 六七二頁下一五行第一〇字「全」，徑作「前」。
- 一 六七二頁下一八行第二字「修」，徑作「心」。
- 一 六七三頁中一六行末字「禮」，徑作「請」。